

四庫全書

子部

欽定四庫全書

子部

池北偶談卷二十二

詳校官庶吉士_臣李如筠

員外郎_臣牛稔文覆勘

總校官編修_臣王燕緒

校對官中書_臣李斯咏

謄錄監生_臣張增

欽定四庫全書

池北偶談卷二十

刑部尚書王士禎撰

博羅韓氏女

明末廣州亂後有周生者市得一袴丹縠鮮好置牀側
衣桁上夜分將寢忽一好女子褰幃驚問之曰妾非人
也生懼趨出比曉鄰里聞之競來偵視聞有人聲自袴
中出若近若遠久之形漸見姿首綽約若在輕塵曰妾

博羅韓氏女也城陷被賊俘擄橫見凌逼罵賊而死此
袴平生所著故附之以來諸公倘見憐愍為作佛事當
往生淨土永脫輪迴言訖嗚咽衆共歎異乃為召僧禮
佛焚袴自是遂絕程職方石臞說

章格菴

黃州曹石霞

昌

崇禎己卯解元癸未進士以文章名世

父卒官順寧旅櫬未返萬里入滇順寧有民家生一兒
七歲不言一日忽語父曰楚人曹石霞吾門生也今日

至此當往見之家人疑怪不信兒輒自往父母尾之至
通衢果有肩輿來者兒從稠人中直前止其輿字而呼
之曰石霞吾待汝久矣曹愕然兒又曰此地未可語當
至邸舍告汝既至邸兒又曰可屏人闔戶如其言兒南
向坐曰我章格菴正宸也一念之誤三墮輪迴始在豫
繼在粵在此候汝又數年矣今可隨我去乎曹歎訝再
拜曰某以父櫬未返葬間關萬里遠涉南荒未能即從
夫子請俟異日兒默然久之曰然則吾先行待汝耳遂

至其家是夕死矣曹賦詩紀異不數月竟卒於順寧其
子以櫬歸至某郡忽重不可舉視其壁上乃有曹入滇
時弔洪半石天祥詩洪亦黃人藁葬於此乃啟洪寢禱於
櫬前請同歸葬於是遂行楊職方鄂州先說

道君畫鷹

楊職方又言武昌張氏有子婦為狐所媚百計驅之不
獲一日置酒召客張宣和御筆畫鷹於堂上比客去狐
夜分始至云幾不免婦問之狐曰汝家堂上有神鷹見

我即奮欲搏擊微項有鐵絙將不免矣質明狐去婦以語其夫或謂之曰畫誠神物曷熱去其絙狐必不敢復至矣如其言至夕果有狐擊死堂下後其家遭回祿共見鷹從火中飛去

道州祠堂

道州有濂溪先生祠堂近歲周氏子孫有為諸生逋賦者州守張大成遼東人徑詣祠堂枷鎖先生像三日見諸彈章比年吳中奏銷逋稅唐荆川繆西谿諸公名列

官戶亦不免云

劉雲山

劉雲山常州醫也康熙丙午杭州有巨室子某病亟忽有一醫到門曰我吳人劉雲山也投一匕而霍然贈之金不受曰他日尋我於毘陵之司徒廟巷踰月某至常詢問廟側有老人曰雲山死三十七年矣顧雲山生時信鬼神曾授夢於斯廟之神募地廣其祠宇因自為像於神旁尚可識其形容也巨室子驚愕入拜其像宛然

哭祭而去陳椒峯

玉璫記其事

趵突泉異

濟南趵突泉地中涌出三尺許餘則方塘漫流清鑑毛髮康熙庚戌藩臬置酒邀提督楊宮保捷忽大雷雨龍首入戶泉涌起丈餘水大上諸公急呼騎水頃刻及馬腹踣墜而死者數人從來未有之異也

陳玉筍

濟寧陳益修字玉筍恂恂君子也明崇禎末濟寧有回

回楊生花等素豪猾武斷鄉里一旦欲毀闕忠義祠廟
擴其居廛陳號召諸生鳴於官懲首事者廟得以存及
鼎革之際生花挾舊憾帥其黨邀陳於天井間箠之瀕
死仍以刀剗其睛啖之以礦灰實目眶棄諸野外家人
舁歸謂必無生理矣至夜陳昏憤中見綠衣神人強之
以酒外青內白痛稍差次夜後見一神人以手擊其腦
後目中血出如注痛良已又次夜見一老嫗食以杏李
又以羊眼盈把令口吸之比覺雙瞳炯然矣生花及其

姪樸乘亂為盜族誅去陳事纔八月也陳乙酉與弟尚謙同舉省試丙戌登第官貴池知縣仕至戶部主事予在京師見之

錦裙宋繡

陸魯望云瓦官寺有陳叔寶羊車一輪天后錦裙一幅予在金陵遊上瓦官寺猶見錦裙所製幡裙紺碧色錦作雲龍紋四角綴十二鈴焦山枯木堂有宋刻絲觀世音像亦奇古

六足龜

暹羅國進貢有六足龜十枚比至京師止存其三其足
前二後四趺趾相連予在主客時見之

按龜三足曰賁

羅漢

予在海陵一士夫家見毘盧國僧號羅漢自言明英宗
土木之變始入中國能風雪中裸體而浴一日席上有
胡桃羅漢以齒碎之凡數十枚舊住通州之軍山以遷
濱海界徙居海陵高郵守墓之祖傳有小像一軸像上

畫一老僧相向坐自記此僧名羅漢毘盧國人一日守
聞軍山有毘盧僧心疑即其人試往謁乃與畫上老僧
了無差別蓋已閱三世百年矣

丙丁龜鑑

丙午丁未從古以為厄歲陰陽家云丙丁屬火過午未
而盛故陰極必戰亢而有悔也康熙丙午冬戶部尚書
蘓納海督撫尚書王登聯等構死丁未春災祲疊見彗
星出太白晝見白青出西北經月餘是歲七月輔臣蘓

克薩哈誅死吾友程職方謂予欲裒輯前史所載丙丁災變徵應為一書頃見宋理宗淳祐中柴望所上丙丁龜鑑十卷自秦莊襄王五十二年丙午迄五季後漢天福十二年丁未通一千二百六十載中為丙午丁未者二十有一備摭事實系以論斷元至正中又有續丙丁龜鑑者補宋元事之闕前人已有此書當考據故明三百年中丙丁事應以續二書之後

白鳥

康熙庚戌六合縣民王振家庭樹產白鳥二督府麻勒
吉表進於朝

奇姓

予在儀曹時見有宛平人碧某者吏誤呼作碧其人不
應問之云碧音如樊此萬姓統譜奇姓通諸書所不載
者又任給事琪云高密有高姓音閤又糕姓音卓諸城
有則姓音支又壽光有驚姓河南有驢姓吾邑有俳姓
壬子典試四川有副榜庾謀音拓明有指揮八通副將

九聚近見山西鄉試榜有峯姓因姓

古銅器

庚戌臨淄人於古城畊田得銅器數百枚形製瑰異白
諸官悉取入藩庫無從考其款識殊可惜也辛亥春京
師草場火火燼得石數千百皆有峯巒之形不測其故
又明末河南鄆陵人浚城壕得石數百皆有人物鬚眉
宛然或謂恐傷地脉掩覆之後有兵

地震定數

宋小說載崔公誼為鄭州任丘簿熙寧初河北地震而公誼秩滿挈家南歸一日宿孫村馬鋪中風電陰黑夜半有急叩門者云傳語崔主簿君合係地震壓殺人數輒敢擅逃過河今已收魂岱嶽到家速來崔自度必死乃兼程送妻孥至壽陽次日遂卒康熙戊申山東地震莒州尤甚莒與日照縣鄰地震之夜凡日照人客莒者皆從崩壓中得不死莒人客日照者皆死信有定數已未七月京師地震通州尤甚死者凡數百人

梨花漁人

會稽姜鐵夫

梗

說其鄉近歲有漁人獨居無家室所居

有梨花數十樹人呼為梨花漁人一夜月明放舟湖中聞岸上有人呼渡移船近之未抵岸其人已在舟中矣視之尼也年可十七八衣縞而姿首甚麗詰所從來不應將及家登岸穿林冉冉而去漁人心知非人明日晚歸燈火熒然則尼已先在室中矣漁人稍疑懼尼曰我非人也居湖邊某村父母自幼送我為尼今年月日死

以與君有夙緣故來相從且君當得佳婦亦須我為作
合幸勿訝也自此鷄鳴而去夜即復來如是將一載鄰
里皆聞漁人室有異香里中某氏有女及笄一日忽有
鬼物憑之言禍福多奇中且云汝女病惟某漁人善醫
且夙緣當為某婦否者死矣其父母懼邀漁人至其家
漁人不知所以固辭歸迨暮尼復來告曰我與君夙緣
已盡當從此辭此女當為君婦崇即我所為君何為耶
漁人誼不負心因與盟誓尼感動泣下亦不復強明日

漁人以告女之父母鬼遂不至不數月漁人竟卒

麟

宋荔裳

琬

觀察說其鄉趙鵬程者官彰德太守府庫中

有一麟相傳明武宗時土人所獲誤斃之以獻於官貯庫中趙任滿欲取之吏不可乃斷其一脰攜歸毛作黃色紋理如刻畫蹄通明類黃玉宋常見之

慶忌

萊人張允恭明天啟壬戌進士為南陽守浚河役夫夜

宿岸側聞橋下每夜有哭聲共伺之乃一巨鼈因置鐵
鑊烹之忽鑊中人語曰勿殺我我當利汝衆懼益烈其
火少頃無所聞啟視之鼈已死剖腹得一小人長數寸
許眉目宛然以獻於守攜之歸識者謂即管子涸澤之
精名曰慶忌是也康熙壬子歲濟南人鮑鼈亦於腹中
得小人如回回狀人多見之

楊李

隋末酸棗邑所進王李一夕忽長清陰數畝是夕院中

人聞空中語云李木當茂帝欲伐之左右曰木德來助之應也不可伐又楊梅玉李同時結實帝問二果孰勝院中人曰楊梅雖好不及玉李之甘帝嘆曰惡楊好李豈人情哉又民間歌云河南楊花落河北李花榮楊花飛去落何處李花結果自然成南唐將受吳禪江西楊化為李信州李生連理其事前後略同又釣磯立談載武義中童謠云江北楊花作飛雪江南李樹玉團枝李花結子可憐在不似楊花無了期與隋謠亦相類

記前生

同年濟寧邵澤輝

士梅

自記前生為寧海州人纖細不爽

後以己亥登進士為登州教官親至所居里訪其子得

之為謀生計且教之讀書為諸生又自知官止縣令及

遷吳江縣知縣遂辭疾歸又其妻早卒邵知其再生館

陶某氏俟其髻而聘之復為夫婦河南張給事

文能記

三生事李御史

嵩陽

樂安李貢士

煥章

皆能記前生事此耳

目覩記之尤著者

萬維嶽

順天萬維嶽

萬

中順治丁酉京畿解元康熙庚戌成進

士其入學題乃夫子循循然善誘人食餽則博我以文約我以禮丁酉領解首題即顏淵喟然章明年

世祖御試題則克己復禮為仁自謂平生與復聖有因緣比庚戌會試三書題無顏子語自謂當落第榜發中

式房師乃儀制主事曲阜顏修來

光敏也

丁貞女

丁貞女聊城之沙鎮人靖難功臣某裔也貞女幼孤無
兄弟依母以居及笄母欲議婚貞女曰母老矣又鮮兄
弟不願適人願終身養母母不能強及母卒從兄某為
議婚貞女又不許獨處三十餘年年五十矣閨範嚴肅
里中人咸稱曰貞女堂邑黃中丞圖安七十喪偶聞貞女
之名遣聘焉貞女先一日召其從兄語曰明日當有議
婚者至吾將許之兄及娣姪輩謾應弗之信也詰旦黃
氏蹇修已及門先是貞女縞衣數十年是日乃易色服

既許字卜吉，葬母始于歸。黃氏猶處子也。中外子孫多人待之，皆有恩禮。東昌人傳為美談。

魏舍人妾

魏舍人

麟

納妾京師甫一月，妾病且殆，求歸母家已而

延魏至榻前，操吳音曰：「某前生姑蘓人，君前生逋吾五十金。今來索償事畢矣。此去當生平陽某氏，年十八，即中甲科，復與君有後緣。語訖而逝。此康熙辛亥春正月事也。」

莫如

孫侍郎退谷先生說昔為祥符令有人發一古冢乃東漢馬武妾墓處中有石即武為其妾自製誌文甚古字畫精絕又有香奩一具中貯脂粉皆宛然奩底一小銅印鐫妾莫如三字印在孫處碑歸張給事文光家今不知所在急就篇有解莫如之句注云漢有毛莫如

義羸

同年張鶴洲行人吾嘗乘一羸甚愛之康熙甲辰鶴洲

以科場事下刑部餽粥不繼乃以羸抵逋于人一日過市酸嘶悲鳴墮其新主而逸歸張邸稍近之輒蹄齧不已家兄考功為賦義羸行嗚呼此羸勝華歆賈充褚淵六臣之徒多矣

龍睛

吳江金文通公

俊生

時母夫人夢人告曰與汝子龍睛

將來位極人臣公大拜後蕭山瞽者陳生善相人試令相之曰乞兒相也衆駭笑已而至目大驚曰此龍睛也

當位極人臣衆乃服能改齋漫錄載陸農師言曾魯公
得龍脊王安石得龍睛

追寫真

宋憲使荔裳

琬

幼失恃每憶母夫人形容輒泣下吳門

某生者自言有術能追寫真人歿數十年皆可得其神
似乃令設壇淨室中自書符咒三日陳丹青紙筆令宋
禮拜出局鐫其戶戒毋譁比夜忽聞屋瓦有聲已夜分
聞擲筆於地鏗然屋瓦復有聲生乃開戶引視之燈燭

熒然丹青縱橫筆落地上而紙仍緘封未啓啓視則像已就宛然如生宋捧持悲泣重酬之生云過六十年則不復可追也蘓穀原道旃璵言云澶淵宋僉憲敬夫幼失怙不識父形容請方海山人貌之持歸家母夫人視之如生悲不自勝世或有此理耳

善謔

京師有市猾某者本騾馬行牙人以附黃臙李至巨富一日堂成讌士大夫壁間有孔竇客疑問之答曰手脚

眼也蓋工匠登降攀附置手足處宋荔裳在坐應聲曰
吾有對句矣乃頭口牙也合坐大笑又萊人某者以散
官居旗常狎一婦婦齧其舌持赴刑部令急騎追之宋
適往視戲曰君所謂駟不及舌

前定

世事莫非前定所云動乎四體有不知其所以然者往
予在淮南好觀棧道圖有興化顧生符稹工此技妙入
毫髮予令畫絹素屏扇凡十數自為長歌題之復以其

一贈姊夫劉大田

倬

既而予有入蜀之役同行即劉君

也辛亥歲在京師沈文恪繹堂

荃

為侍讀以小冊索書

予為書陸放翁詩云殘年作客遍天涯下馬郵亭便似
家三疊淒涼渭城曲數枝閒澹閬中花擘牋授簡相逢
晚理髻薰衣一笑譁俱是邯鄲枕中夢墜鞭不用憶京
華比入蜀宿閬中乃憶前事真詩讖也因賦一詩寄沈
葭萌關外極天涯長憶西園夜鬪茶萬事輸他前定
在今朝真看閬中花曩丁未歲四月二十九夜夢中得

絕句云溪鋪翡翠映煙空溪上飛橋落彩虹愛玩花叢
憶元相一枝渾卧碧流中既覺不知所謂末句則元微
之使東川所賦亞枝紅詩也至是過褒城亦驗予已酉
奉使淮上過奉高閱秦安州志至羸博字輒心惡之辛
亥壬子遂連遭渾沂兩兒之痛入蜀時過百牢關作一
詩懷諸兄結押廬字忽心動曰廬廬居也得勿不祥乎
又閱劔南詩有云成都放榜第一人楊姓具慶下愴然
有感又心惡之比榜放解元果楊兆龍也心益動時先

慈宜人已見背予在萬里外未知也昔阮孝緒於鍾山聽講母王忽病兄弟將召之母曰孝緒至性冥通必當自到果心驚而返信有是哉

工人善琴

萬厯末詹懋舉者守潁州偶召木工詹適彈琴工立戶外矯首畫指若議其善否者呼問之曰頗善此乎曰然使之彈工即鼓前曲一過甚妙詹大驚異詰所自工曰家在西郭外往見一老人貿薪入城擔頭常囊此因請

觀之聞其彈心復悅之遂受學耳詹予以金不受曰某
賤工也受工之直而已又曰公琴皆下材工有琴即老
人所貽今以獻公果良琴也詹乃從竟學一時琴師莫
能及

盧昭容

古月頭陀歙人胡姓名明勲字半菴順治丙戌居京口
兩膝忽患瘍痛入骨髓數日宛成人面眉目口鼻皆具
易醫一百三十餘人瀕死者數矣辛卯十二月七日瘡

忽人言曰我梁時盧昭容也予害我於洛陽宮今日報
汝醫何能為詣佛懺悔可耳既甦即謝醫發願書經書
水懺至九卷遂杖而起終三十六卷復閉闔書法華經
華嚴經各一部遂能行又書涅槃經金光明經心地觀
經報恩經金剛經凡五百萬字瘡竟愈後在真州有降
乩者書盧昭容邀半菴與會自畫生時像首飾鳳髻衣
宮衣問半菴洛陽宮相見今似否胡為悚然胡天啟中
官中書舍人嘗收左忠毅公骸骨云

義虎

汾州孝義縣狐岐山多虎明嘉靖中一樵人朝行失足
墮虎穴見兩虎子卧穴內深數丈不得出徬徨待死日
將晡虎來銜一生麋飼其子既復以餒予樵樵懼甚自
度必不免迨昧爽虎躍去暮歸飼子復以餒與樵如是
月餘漸與虎狎一日虎負子出樵夫號曰大王救我須
臾虎復入俛首就樵樵遂騎而騰上置叢箐中樵復跪
告曰蒙大王活我今相失懼不免他患幸導我通衢死

不忘報虎又引之前至大道旁樵泣拜曰蒙大王厚恩
無以報歸當畜一豚縣西郭外郵亭下以候大王某日
日中當至無忘也虎領之至日虎先期至不見樵遂入
郭居民噪逐生致之告縣樵聞之奔詣縣廳抱虎痛哭
曰大王以赴約來耶虎點頭樵曰我為大王請命不得
願以死從大王語罷虎淚下如雨觀者數千人莫不歎
息知縣萊陽人某也急趣釋之驅至亭下投以豚大嚼
顧樵再三而去因名其亭曰義虎亭宋荔裳琬作義虎

行王于一猷定作義虎傳紀其事

客氏刺

順治己亥在京師於慈仁寺市見鬻故書者賣一敝刺
大書客氏拜三字寶應朱國楨生以三錢得之賦客氏
行予笑曰使當天啟時此一紙過詔旨遠矣

驕

先太師公曾於塞上得馬一角按爾雅驕如馬一角注
元康八年九真郡獵得一獸大如馬一角角如鹿茸即

驕也王會圖有俞人之雖馬注雖馬一角

來陽伯

來陽伯

復

三原人神於醫尤多技術常使人脫靴脛隨

之長幾丈許靴亦如之尤精女紅官吳中時刺繡之妙
吳中閨閣無能及者來三原人萬厯中進士官至布政
使

啖石

仙人煮石世但傳其語耳予家傭人王嘉祿者少居勞

山中獨坐數年遂絕煙火惟啖石為飯渴即飲溪澗中
水遍身毛生寸許後以母老歸家漸火食毛遂脫落然
時時以石為飯每取一石映日視之即知其味甘鹹辛
苦以巨桶盛水掛齒上盤旋如風後母終不知所往

周府馴虎

先祖方伯公為河南按察使時周王府有馴虎日惟啖
豆腐數斤猛虎如此何異騶虞

楊世榮

楊世榮者汾陽人以鬻器為生夜夢人告之曰汝富貴至矣覺則身忽長二丈餘一衣須布十八疋每食啖一烝羊用一鐵鞭重百六十斤鄒平張方伯毓時知縣事錄為民壯後遷寧武道以之自隨會流賊亂每步戰殺賊賊皆披靡以積功至參將鼎革後不知所終

金蟄

先太師舊有金蝦蟇一枚崇禎辛未潰卒陷城一賊得之置腰間輒爬其腹如是者數四賊怒擊破之有白氣

冲天而去

劉張二仙

劉吏部公馘

體仁

劉先生傳云劉任字弘父潁川人生而

一瞳子正方登隆慶丁卯賢書嘗著唐巾衣淺紅窄衫

乘駿馬挾彈林薄間一日謂家人曰仙伯期我海上某

日暫還題一詩有明白來時明白去君看直北起雙鳧

之句遂瞑後十五年有故人從燕中來者云見先生書

一詩於西山蘭若僧曰日者一先輩留此亦時時往來

寺中問其狀則先生也遲寺中數日待之不復至矣又同里張葵孝廉者髮長等身無一莖異七歲時讀書樓上忽一黃冠來告曰從吾步空下即仙矣葵有難色黃冠叱之即能步空下居城東十里許一日有道士服過之者曰吾望氣而來乃子耶幸勿墮落遂別去然張竟無他異

鳩食麥

康熙癸丑吾邑旱東山曹村有鳩千百成群食麥近羽

孽也

蠟蠅硯

張華東公

延登

崇禎丁丑三月遊泰山宿大汶口偶行飯

至河濱見水中光芒甚異出之則一石可尺許背負一

小蝠一蠶腹下蝠近百飛者伏者肉羽如生蠶右天然

有小凹可以受水下方正受墨公製為硯名曰多福硯

銘之云泰山所鍾汶水所浴堅勁似鐵溫瑩如玉化而

為鼯生生百族不假雕飾天然古綠用以作硯龍尾繼

躅文字之祥自求多福爾雅蝙蝠服翼郭璞注齊人呼

為蠟螟因又名之曰蠟螟硯公門人劉文正理順馬文忠

世夏考功允高中丞衡名諸公皆為銘贊亦奇物也

荊州鏡冤

荊州有某氏子素亡賴一日於後圃築牆夜夢一美女
子前拜曰妾在地下數百載矣修煉將成明日大劫懼
不可逃惟君救之妾胸前有古鏡一枚君慎勿取但為
妾復掩其藏誓報厚德覺而厯厯能記明日集畚鍤掘

地未丈許果得一棺發之中有女子古粧靚服顏色如
生胸前有鏡方圓數寸寒光射人毛髮某憶夢中語欲
掩之其僕曰鏡必有異第取何害某遂取之女子忽化
為灰燼某駭甚遽掩其棺是夜復夢女子泣告曰吾煉
形已成為汝所敗然自刼數應爾於汝何尤汝但珍護
吾鏡吾當福汝某遂寶鏡虔奉之鏡時時有聲一旦女
子來曰楊相公開府江陵思得奇才共濟此功名之秋
也試往軍門獻策吾當助汝時武陵楊相國督師駐荆

某信其言遂往上謁楊公與之語某談兵料敵高議縱橫不可窮詰公奇之延致幕中每有戎機輒與叅決將聞於朝官之一日某以小過筴其僕僕竟死方在幕府不知為計女子忽至曰無傷也君但請暫歸休沐輿尸以出吾能護汝如其言至轅門忽輿中血出如注軍校輩驚視之得僕屍馳報府中召某問之但云罪當死既而語以兵事亦懵然不復能對公怒究其故某始對以女子所教已都不知今鏡尚在公命取鏡鏡忽作大聲

飛去自是女子不復至矣某竟瘐死獄中鄭禮部次公
日在成都說奎

池北偶談卷二十

欽定四庫全書

池北偶談卷二十一

刑部尚書王士禎撰

每牛雖馬菌人埽人

予在禮部見荷蘭所進西洋小牛異之考王會圖所載有數楚之每牛注每牛牛之小者王會圖又有俞人之雖馬注雖馬一角大者曰麟按爾雅驪如馬一角不角者騏大荒南經曰蓋猶之山有小人名曰菌人東經有

小人國名靖人或曰淨人

銀杏樹觀音像

辛丑壬寅間京口檄造戰艦江都劉氏園中有銀杏一株百餘年物也亦被伐及工人施刀鋸則木之文理有觀音大士像二妙鬘天然衆共駭異乃施之城南福緣菴中時蘄州瑞光寺有觀音像亦大木中文理自然結成之

唐童子

松江唐童子勲五歲而瞽年十二詩多可誦其先有汝

詢字仲言者亦瞽而能詩嘗註唐詩傳於世周宿來

茂源

贈童子詩云家風師曠遠家學卜商傳又永平孟元輔

熊忠毅公子少而失明好讀書聽輒成誦嘗選唐人詩

五十家亦奇人也

體香

先考功西樵於癸丑七月廿二日以哭先淑人不起屬
續時口鼻中作梅檀蓮華蘭蕙種種異香凡三日夜益

都高木王梓予從姊之夫孝友忠信人也以康熙甲寅春捐館病革時體中亦有異香此皆予聞見最確者

黃鬚

宋范公稱過庭錄載黃鬚傳即今所傳虬髯事也然其間云於汴州見太宗殊紕謬黃鬚兒曹操呼其子彰而此傳李衛公所遇亦稱黃鬚

柳耆卿墓

儀真縣西地名仙人掌有柳耆卿墓按避暑錄柳死旅

殯潤州僧寺王平甫為守出錢葬之真潤地相接或即
平甫所卜兆也予真州詩云殘月曉風仙掌路何人為
吊柳屯田

普救寺

西廂傳奇河中有普救寺畫墁錄郭威宿師河中逾年
登蒲阪以望城中憤蒲民固守曰城開日當盡誅之幕
府曰若然守愈固矣第告之曰誅守城者餘皆免城既
開乃即其地為普救寺蒲志云舊名永清院院僧與郭

威約城克之日不戮一人因改名普救寺二書大同小異然寺名實始五代傳奇假以成文耳

神女廟神鴉

巫峽神女廟有神鴉迎送客舟陸放翁入蜀恨不及見予壬子冬下三峽至十二峯果有鴉十餘往來旋繞以肉食投之即攫去十不失一其鴉比常鴉差小棲絕壁石洞中得食即入洞去天祿閣外史曰嘉陵之墟其鳥曰鳶臨溪啄影則孕吐于口而生方密之智通雅云嘉

陵漾江之口下至巴東皆有神鳥所謂嘉陵之鳶指此
或謂山鳥穴乳即爾雅之鷦

三僧

坡詩有琴聰蜜殊謂僧思聰仲殊也放翁筆記云思聰
大觀政和中以琴遊權貴間遂還俗官御前使臣仲殊
自縊以死參寥尤為坡公所喜政和中老矣亦還俗又
墨莊漫錄載呂溫卿為浙漕屢起大獄復欲網羅參寥
參寥本名曇潛東坡改之曰道潛呂索牒勘驗竟坐刑

之還俗編管兗州

一字字

筆記云錢鰲字穆范祖禹字淳本皆一字子按古如爰
絲房喬顏籀劉乂之類皆一字字也今文士有寶應陶
徵字季萊陽董樵字樵二人皆以布衣遊於都門初不
相識予為介之曰二君非但詩筆相當即一字字亦絕
對也二君遂賦詩定交按龍川別志有隋時道士屈突
無為字無不為晁景迂一字伯以父見陸務觀文集劉

敬劉攽兄弟字伯貢父仲原父見歐公所作原公墓誌前涼張天錫字公純嘏見十六國春秋此又三字字也陶一字昭萬有太原傅山字青主一字公之佗

趙廣戴祿

趙廣合肥人李伯時小史伯時作畫常令侍左右久遂善畫尤工畫馬幾亂真遭亂為賊脅之作畫不肯從斫其右手乃以左手畫大士宋南渡士夫家所藏伯時大士多是廣筆戴祿者臨邑邢子愿先生家僮亦精六書

之學與子愿書往往亂真邢與寒家有姻婭之好予幼時多見屏幃間署子愿姓名率戴書也

古石刻

大梁城西水磨間有人掘地得一石有日月逝酒漿五字乃古篆也周櫟園侍郎摹勒以傳謂非仙者不能道施愚山有詩記之

墨魚

蜀嘉州凌雲烏尤山下有魚曰墨魚行則噴墨云郭璞

注爾雅於此魚食硯墨所化立春後泛子漁人以燈火照之輒止不去南越志謂烏鰂懷墨而知禮蜀本草圖經云烏鰂名海鰂鮪九月烏鰂入水所化不知即此一種否予在蜀見之

鐵漢和尚

鐵漢和尚居金陵牛首東峰下獨坐數十年嘗蓄二猿子自隨有所須猿輒解意與龍眠方學士坦菴拱善特

構一軒方來即居之號曰坦軒和尚化去二猿悲鳴不

食死葬於塔側學士題其遺像云兩箇獼猴杖一根獻
花石上獨稱尊怪公事事能超脫留此賊私誤子孫

駙馬

懶真子云御馬之副謂之駙馬杜預尚主武帝拜鎮南
大將軍給追鋒車第二駙馬吾鄉有為尚書子壻者與
婦兄同赴京師一日向友人訴廐吏云婦兄馬肥吾馬
獨瘦友人笑答曰彼正馬也君駙馬耳那得一例合坐
大笑此雖戲語深合故實

厚葬薄葬

秦始皇穿治驪山上具天文下具地理漢文帝遺詔霸陵山川因其故毋有所改二君之賢愚人皆知之乃亦有相反者宋壽州張侍郎撫州晏丞相俱葬陽翟相去數里有盜發張墓得金寶珠玉甚多遂完其棺槨掩覆其穴繼發晏公墓無所有器皆陶甓破其棺惟木胎金裹帶一盜失望大恚以刀斧碎其骨而出世謂張以厚葬完軀晏以薄葬碎骨事之不可知如此

鳥異

益都縣顏神鎮康熙辛亥冬鳬鴈駕鵞之屬以千萬計
飛過城中皆墮地死遠近四山皆滿甲寅春復然已而
相國沚亭孫公廷銓薨於私第公世為鎮人

二玉璽

順治十七年富陽典史孫某解餉北上舟過高郵見湖
中夜有光令榜人跡之得玉璽水中方四寸六分盤龍
雙紐辨其篆文漢高帝大風歌也十二月疏獻于

朝鄧州人丁象輝賦太風玉璽歌又康熙四年十月初
八日漂水民耕田得玉璽其文乃人心惟危十六字亦
上於

朝

青原道場

龍眠無可和尚本方姓故明崇禎庚辰進士早以文詞
知名亂後為浮屠曾住金陵高座寺劉公猷見之衣壞
色破衲衣行纏束腰居然苦行頭陀也最後住吉安青

原山青原古道場也明王陽明鄒東郭南臯諸先生亦講學於此住山後有倒荆久枯忽發三枿會施愚山閩章分守湖西講學白鷺洲與之往來青原宗風一時復盛

冰山

康熙戊申予邑北錦秋湖中冰立如山高可數丈許巖洞林巒皆具千峰萬壑宛轉關通遠近走觀之入其中者如在深山而表裏洞徹類晶玉旬日始消

異鴉

邑東北耿氏墓林中有鴉一隻碧色飲啄自異不與羣
鴉為伍亦不見其蕃育人往往見之按唐書滕縣有羣
鳥噉柴為城中有白鳥碧鳥各一又城東旬名店有白
燕二居民家井中皆康熙十二三年間事

昭烈券

獻賊破荊州時民家有漢昭烈帝借富民金充軍餉券
武侯押字紙墨如新見綏寇紀略

蜀府鬼

獻賊據成都以蜀王府為宮所居人鬼相觸一日聞後
殿有歌吹聲自往視之見有數十人手持樂器而皆不
見其首大驚仆地乃移居北城樓不敢入宮

馬岱後

黎州土司馬金者蜀漢將軍馬岱之後張獻忠在蜀以
金印招之金得印擲之地誓衆拒之金時年十六未幾
卒

張儲

張儲字曼胥南昌人大學士位之弟多才藝醫卜星相
堪輿風角之術無不通曉萬厯間遊遼東歸語人云吾
觀王氣在遼左又觀人家墓地三十年後皆當大貴行
伍間巷中兒童走卒往往多王侯將相天下其多事乎
人以為狂既而其言果驗儲年七十餘卒其外孫夏吏

部押公

以
銓云

孝芝

洛陽呂忠節公

維
祺

撰孝經大全三十年至崇禎十三年

庚辰告成夢神人錫以丹篆又袖出一物如黑飴條生
二白角化為黃羝羊約七八寸優游草際謂公曰此孝
芝也明日果有芝生庭中凡十八莖剗者誤去一莖明
日復生說者謂應十八章之數云公自作孝芝記

十具牛

王景略臨終托其子皮十具牛為治田之資不為求官
亦葛侯八百本桑之意今江淮以北謂牛四頭為一具
俗語亦有所本

壽冢

梁國兒仕姚秦封平輿侯嘗於平涼自作壽冢將妻妾
入冢飲讌酒酣升靈牀而歌八十餘乃卒可謂達者近

溜川高侍郎念東

珩

亦自作生壙時與友人唐翰林濟

武

夢

齋飲酒賦詩其中德州程工部正夫

貞

自作一棺題

曰休息菴自作銘刻其上酒酣便即偃卧有詩云版屋
蕭然密四周愚人息矣聖人休百年恍惚真疑夢萬事
紛紛已到頭廣柳何時催去駕猗蘭此夕詠閒愁相煩

惟客來欣賞莫待遙憐土一丘

千里人

南燕慕容超時高句驪獻千里人十人

畢尚書

淄川畢白陽

自嚴

先生明崇禎初為戶部尚書精心會計

為時名臣時練餉新餉諸項日增臺諫多歸咎司農一

言官以亢旱上疏有烹弘羊天乃雨之語先生笑謂人

曰此非烹弘羊直是要烹白陽耳

謔語

王完虛中丞黠明萬厯甲辰進士好詆謔初仕為鄒平

知縣縣與章丘接境一日與章令某相見令問足下以何年生對曰乙亥因問章令答云亦乙亥王笑云某是鄒平一害兄便是章丘一害

排調

同年薛給事奮以才氣自許常在淮陰酒間謂予云子

文士耳異日終依我幕下予答曰恨吾子非嚴鄭公耳

汪茗文亦有詩調之云十載雕蟲稍擅名未曾縛袴學
長征他年若得登三事但取蕭郎作騎兵

引經

德清陳端菴

凝

順治己丑進士筮仕為新城令性仁厚

每杖人輒對之泣有王生者宅為人所奪久不給直訟
於官陳不能決第好語曰毛詩云維鵲有巢維鳩居之
王秀才獨不能作鵲耶聞者笑之

士大夫

南史紀僧真得幸齊世祖請於上曰臣出自武吏階榮至此即時無復所須唯就陛下乞作士大夫上曰此由江數謝淪我不得措意可自詣之僧真承旨詣數登榻坐數顧左右曰移吾牀遠客僧真喪氣而退告上曰士大夫固非天子所命六代時士大夫之重如此

兩周盤龍劉桃枝

蕭齊時兩周盤龍一奉叔之父於淮陽大破魏軍一徐州民與建康僧法智作亂為王元邈所誅南北朝兩劉

桃枝一北齊人洋湛間多拉殺諸王大臣在涼風堂殺斛律明月者一陳威鹵將軍克齊朐山城

程蘓謔語

元祐初司馬公薨百官方有慶禮事畢往弔伊川引子

於是日哭則不歌東坡

云

然檀弓衛太史柳莊寢疾公

曰疾革當祭必告公再拜稽首請於尸曰有臣柳莊也

者非寡人之臣社稷之臣也聞其死請往不釋服而往

遂以祔之又梁左軍將軍馮道根卒是日上春祀二廟

問中書舍人朱异曰吉凶同日今可行乎异引衛獻公以對上即幸其宅伊川何未衷於此欒城遺言載此條則是潁濱事非東坡

孫忌語

南唐孫忌語馮延巳曰僕山東書生鴻筆麗藻十生不及君詠諧歌酒百生不及君諂佞險詐累劫不及君

雙塔

京師雙塔乃安祿山史思明所造而劉侗景物畧不載

元廼賢易之詩云安史開元日千金構塔基世尊寧妄
福天道自無私寶鐸遊絲罽銅輪碧蘚滋停驂指遺蹟
含憤立多時

何老菴

吾邑東六七里有何老菴何元時人修道於此獨居數
十年每夜有蛇虎伴之菴後有積水曰菴龍池相傳何
老擾龍處

虹橋板

榕城書肆有虹橋板一片色黝而澤文理堅栗發聲清越材中琴瑟云產武夷山中不辨何木也興化林穆之
賓王賦虹橋板行記其事

漢人唐人秦人

昔予在禮部見四譯進貢之使或謂中國為漢人或曰唐人謂唐人者如荷蘭暹羅諸國蓋自唐始通中國故相沿云爾馬永卿引西域傳言秦人我丐若馬注謂中國人為秦人各以通中國時為稱古今不易也

真龍石龍

宋中丞牧仲

華

說順治二年在京師見大內所藏真龍

全身盤屈貯篋中一角五爪鱗甲如鐵長丈餘陳宮簷

說巖

廷敬

說康熙十四年陽城張侍郎東山

爾素

家鑿石中

有石龍一鱗甲頭角宛然刻畫亦長丈餘

淨池魚

宗弟九青侍講

嘉豫

扶風人家渭水上去太白山二十里

云太白一峯直上三十里盛夏雪霰不絕人無能登其

巔者惟六月可上上有太白神殿以鐵瓦覆之有五池有鳥紅色大如雀池有滓穢則銜去之名淨池鳥山奇寒無林木鳥獸此鳥亦不知棲止何所也按客座新聞云每墮葉則鴛鴦鳥銜出之紅魚有長丈餘者

五行

陸象山云五行書以人始生年月日時所值晨推貴賤貧富夭壽禍福甚詳乃獨畧於智愚賢不肖曰純粹清明則歸之富貴福壽曰駁雜濁晦則歸之賤貧夭禍易

有否泰君子小人之道迭相消長各有盛衰純雜清濁
明晦之辨不在盛衰而在君子小人今顧畧於智愚賢
不肖而必歸之富貴貧賤壽夭禍福何耶沙隨程氏云
易以道義配禍福陰陽家獨言禍福而不配以道義如
此而說遇獲禽則曰吉得正而斃則曰凶故文中子曰
京房郭璞古之亂常人也二說可互證

常熟三鼎甲

常熟南門地名山塘港琴川水經處三鼎甲居第相望

中孫扶桑

承恩

前趙東田

士春

後瞿文懿

景淳

三公臚傳年皆

三十九尤奇扶桑弟舉人場為予說如此

杜氏

康熙丁酉山東東昌府館陶縣民婦杜氏年一百十三

歲載縣志

秦宣太后晏子語

國策楚圍雍氏韓令尚靳求救於秦宣太后謂尚子曰
妾事先王日先王以髀加妾之身妾固不支也盡置其

身於妾之上而妾弗重也何也以其少有利焉此等淫
褻語出於婦人之口入於使者之耳載於國史之筆皆
大奇又晏子春秋景公蓋姦圉人視景公僭者問之曰
竊姦公也公將殺之晏子入見公曰色寡人故將殺之
晏子曰嬰聞拒欲不道惡愛不祥雖使色君於法不宜
殺也公曰然若沐浴寡人將使抱背此段問答亦奇

姚康伯

崇禎時內殿石驪長數寸上以問大學士何文端公

如寵

何謝不知歸問其老友姚康伯康伯曰此璞也中必有玉翌日以對上命剖之果得玉上訝其博物何謝曰臣友姚康伯教臣也因召見欲授以官不受姚字休那與文端俱桐城人張學士敦復英說

李頻

唐詩人李頻字德新睦州人名列唐書文藝傳才調集所載中流欲暮見湘煙一篇其作也懿宗時為建州刺史卒見神黎嶽郡人祠祀之宋紹興中封靈顯忠惠公

後加靈佑善應王再加廣濟王又加福佑威濟信順王
明洪武初改建州刺史之神載在祀典宋真丈忠公序
其詩今所傳黎嶽集是也詩人歿而為神未有如頻之
昭昭者

寶藥

江浦周西水兵部名于漆幼不能言然頗能記前世為
某邑人所常栖止處廣庭中設一几庭前有紅薔薇一
叢時時夢到其地七歲時戲門前有僧過門顧之曰此

郎有夙因周應聲即能言家人驚喜因令讀書一過目如宿習數月徧通經書左國史漢年十四讀書山中精舍一日日夕憩溪邊石上遇老僧謂曰郎忘七歲門前相見時耶叩其名曰我寶藥也閩人周因畱之舍中日夜與論象緯律厯六壬丁甲勾股洞章之術未半載盡通其說瀕行復以黃河海道九邊三圖授之且曰吾數學未傳人今當遊四方訪之又祕語周以十年之內天下必大亂君異代人物也自丙子迄甲申果九年而明亡皆

如其言周入

本朝以明經謁選人常念寶藥別時贈詩有元夕燈前
尋賈子秋風臺下拜鄒生之句未詳所謂及謁選得房
山令上元與僚屬讌於賈公祠問之唐詩人賈閬仙祠
也問有子孫乎吏對有賈某者其裔也見以逋稅繫獄
周令急出之代完其逋是年秋調平谷令抵縣日即出
勘田畝夜宿山村古廟比晨視其額則鄒衍祠也於是
悟寶藥之語一無爽焉周述其學著三才儒要三十卷

追尊始祖

唐以老子為玄元皇帝蜀王衍追尊王子晉為聖祖至道玉宸皇帝

沈石兄

萊陽沈石兄名迅明崇禎辛未進士官給事中鼎革後家居一日其傭奴鉏田見禾葉上皆有篆書如蟲蝕者其文曰沈迅死是年沈禍作舉家自焚

棗栗

白虎通義曰婦人之執以棗栗殿修棗取其朝早起栗戰慄自正也今齊魯之俗娶婦必用棗栗諺云早利子也義本白虎通而稍訛南宋時太學生齋祭用棗子荔枝蓼花曰早離了也殊可捧腹矣

一生七子

明天啟中大名民家一生七子俱成立每疾病則七人同之王比部令少寓天雄猶及見其第三子云康熙戊申安徽巡撫張中丞

朝珍

疏報歙縣民吳士全妻呂氏一

產四子同年李望石

贊元

說順治中按楚有漢川縣民王

某妻一產六子按北魏延興三年秀容郡婦人一產四男四產十六男與此相似

郝推官

郝某失其名嘗為湖廣某郡推官一日送直指宿驛中夜坐篝燈倦而假寐恍惚見有白衣女子鍼刺其額驚覺遂就寢既卧又若有刺其股者創甚急呼童子然燭視之果有鍼在左股疑其刺客乃秉燭巡視室中空無

所有至屋隅暗處有緯蕭障之隙而窺焉見一物如大鳥人立遍體似水晶臟腑皆見人即前攫急以手中挺逼之遂倚壁上不能起大呼從人破牕而入挺刃交下乃死竟不知其何怪也劉吏部公馘說

林四娘

閩陳寶鏞字綠厓觀察青州一日燕坐齋中忽有小鬟年可十四五姿首甚美寡簾入曰林四娘見陳驚愕莫知所以逡巡間四娘已至前萬福蠻髻朱衣繡半臂鳳

背鞞腰佩雙劍陳疑其仙俠不得已揖就坐四娘曰妾
故衡王宮嬪也生長金陵衡王昔以千金聘妾入後宮
寵絕倫輩不幸早死殯於宮中不數年國破遂北去妾
魂魄猶戀故墟今宮殿荒蕪聊欲假君亭館延客固無
益於君亦無所損於君願無疑焉陳唯唯自是日必一
至每張筵初不見有賓客但聞笑語酬酢久之設具讌
陳及陳鄉人公車者十數輩咸在坐嘉肴旨酒不異人
世然亦不知何從至也酒酣四娘叙述宮中舊事悲不

自勝引節而歌聲甚哀怨舉坐沾衣罷酒如是年餘一
日黯然有離別之色告陳曰妾塵緣已盡當往終南以
君情誼厚一來取別耳自後遂絕有詩一卷長山李五
絃司寇化有寫本云又程周量會元記其一詩云靜鎖
深宮憶往年樓臺簫鼓遍烽煙紅顏力弱難為厲黑海
心悲只學禪細讀蓮花千百偈閒看貝葉兩三篇梨園
高唱闕君試聽之亦惘然

秦時人

遼東醫無閭山中有人斲參見毛人長丈許驚而却走
毛人招之曰吾非妖魅乃秦時築長城卒昔同輩數萬
人今僅七人在耳因問其飲食居處狀曰始饑食松栢
實渴飲溪水久之不復饑渴矣言已去如飛鳥友人某
親聞之操江宜中丞永貴云又巴山中有白髯叟采樵者
嘗見之自云唐時人岳儀部石齋貞說

離非女子

故友南粵陸漢東

卿

孝廉有小硯是南漢劉鋹宮中物

有張宮人離非女子篆銘卿死子幼此硯不知流落何
所石埭令姚六康莊為予言之姚亦粵人

謝在杭

謝在杭肇閩之長樂人少讀書邑蕭氏園園素多怪異

人無敢居者謝不之信一夕坐燈下忽一女子前拜且
泣謝叱之女子曰妾負冤久求公申之非魅也妾湖州
德清人幼隨父客此同行某甲者中表戚也利父囊橐
遂殺父恐妾鳴於官司併置諸死今數載矣公異日必

官於湖望逮甲窮治抵罪使妾家知妾父子死所父子
目瞑矣謝許之戒勿復出為崇自是竟無它是年謝中
鄉試果筮仕湖州推官抵任後即檄縣捕甲至一訊立
伏遂抵罪郡人以為神姚禮部琅曾令長樂為予言如
此

南江野人

蜀張獻忠之亂遺民奔竄山谷久之遂為野人南江有
二野人能手格猛虎恒擘獐鹿啖之懸崖絕壁騰上如

烏隼雖其家人親戚招之疾走不顧也岳儀部石齋南
江人為予說

尼涵光

尼涵光江西宜黃人姓鄒氏歸譚大司馬綸之孫其夫
椎魯不知書涵光棄去走京師上書請南遷不報會鼎
革遂為尼每談故明門戶事源流甚晰居寶應朱秋崖
克曾見之

陳百史

秀水張侍郎

天植

流塞外時一夕召乩仙仙至大書云我

陳百史也今為尚陽堡土地因謂諸公可召吾兒來時
其子掖臣徙居尚陽家城外張謂城門下鑰請俟明日
又書云渠今夕飲城內某家往偵之果然比至凡書數
百言皆言家事及訓誡之語後在遼陽海寧相邸中亦
往往見形與談笑如平生

宋齊丘語

宋齊丘表請與故吳太子璉絕婚曰非獨婦人有七出

夫有罪亦可出此與左傳人盡夫也之語可為絕對

漢碑異姓

金薤琳琅所載漢碑碑陰故吏門生姓名有絕異者如

韓敕碑有庶

次公

充

宙

番

君舉

加

進

丕

輝魯人

恐

即

弓

如

骨

通孔宙碑有叔

香

如廬

浮海

劇

北

薤

章

魯峻

碑敢

敦

東

鄉

晨

河間

景君

碑羽

質

臨

照

水丘

郎陵人

營

中

名闕字

昊

季遠

昊

詩立

遷

又漢碑陰有弟子

洪丞相

隸釋

謂親受業者

門生

次相

傳授

門童

未

故吏

掾

故民

占

處士

非吏

義士

義民

非所

又有

故修

行趙明誠謂後漢百官志注河南尹官屬有循行百三
十人晉書百官志亦有之修乃循之訛都穆謂當信
碑本以正故午似是阜
漢書之誤隸賤役

香山壘

壘門在香山縣大海中忽起一石埂廣十餘丈長六里
許首尾相屬不斷如蓮之有莖中途甕城名關閘踰之
抵壘門則如蓮的番人依山築城廣袤四五里三面皆
臨巨浸惟北通地脉一莖耳海中諸峯包裹前十里為
十字門如兩眉橫列而缺其正中又南十里為小橫琴

塞隘口又南稍折西為大橫琴重案也番人之停船必於灣灣之所在即名澳香山故有澳名浪白諸番互市其中而今之塞門則舊名濠鏡地有南北二灣明萬厯中有大西洋人至此樂之遂請濠鏡為澳而就二灣停船久之益自彼國遣衆聚居歲輸稅五百金

本朝除之番人安其業者已數世所居率依山為樓三層方者圓者三角者六角八角者俱為螺旋形以入其教曰天主其寺曰三吧高十餘丈於屋側啟門戶石作

雕鏤金碧照耀寺僧曰法王以時集男女禮拜其所奉
曰天母名瑪利亞抱一嬰兒曰天主為耶穌被服珍怪
障以琉璃望之毛髮生動云漢哀帝時人也寺有風琴
其琴銅絃彈之以和經唄并管簫諸樂器藏機木柜聯
以絲繩輪牙相錯一人轉機則諸音並奏有定時臺巨
鐘覆其下立飛仙臺隅為擊撞形亦以機轉之按時發
響起子末一聲至午初十二聲復起午末一聲至子初
十二聲晝夜循環無少爽前揭圓槃書十二辰俟某時

鐘動則蟾蜍移籌拍某位有千里鏡番人持之登高以望舶械仗颿檣可矚三十里外又有玻璃千人鏡多寶鏡顯微鏡小自鳴鐘自行表以及海洋全圖璇璣諸器皆極工巧花有貝多羅丁香禽有五色鸚鵡公鳳倒掛獸有獐獐短狗其人昂鼻蜷髮目深碧不眵貴女而賤男晝卧而夜起男有白黑二種白者貴黑者為奴衣以多羅尼辟支曳高屐戴黑氈笠相見脫之以為禮腰佩長刀刀著地尺許間有握赤藤者則甚貴舉中四人而

己其女子則華滿寶靨出以錦被蒙其首而跣足不襪
其家政女子操之父死女襲其業男子則出嫁女家不
得有二色犯者女訴之法王立誅死或許悔過則以鐵
鈎鈎其手足血流被體而免之舉中有議事亭番目四
人受命於其國更番董市事凡市經四人議衆莫敢違
及官司有令亦必下其議於四人者議得當以報聞其
行賈之地曰馬西以中國絲帛白鉛易胡椒檀香蘓木
以歸且與馬西約不得以所產市他國康熙辛未馬西

背約私與他國市壘人怒駕舸往所市之國責之馬西
患之遂相仇殺死者三百餘人市道中絕稍西曰小西
洋去中國萬里半年始至所產有碧琉璃諸器極西曰
大西洋去中國九萬里三年始至往者以其太遠祇就
旁島遷販未嘗親至其地也番舶之出以冬月冬月多
北風其來以四五月四五月多南風既出則壘中黑白
鬼一空計期當返則婦孺遠屋號呼以祈南風亦輒有
驗其舵工素與海習雖卒遇颶母浮椒亦萬不失一云

右見龔兵部衡圃

翔麟

珠江奉使記

池北偶談卷二十一

欽定四庫全書

池北偶談卷二十二

刑部尚書王士禎撰

銀瓦寺古鏡

謝郎中方山重輝言明末德州修河堤於銀瓦寺前地中

得古鏡一規製甚小照見隔城樓閣塔寺人物往來纖毫畢具寺僧深匿之今亡

短人

田少司寇漪亭

雲

言德州兵器庫自明季局鏑久順治

初有司開視之於室與壁下見一短人身纔尺許形如老翁徧體有毛左膝長跪左手垂而拳右足履地右肘拊膝而手承頤鬚髮皓白攢眉閉目若悲苦之狀頃之雷電繞屋失所在

嶗山道士

嶗山又名勞山在即墨界山中多一二百歲人有高密張生者讀書道觀觀有老道士形貌怪醜執樵蘓之役

張意忽之一日買二牛其家去山百餘里苦無人遣送
方躊躇頃道士忽謂張曰君似有所思得勿以牛故耶
吾為君送之張異其言逡巡已失牛比歸問家人曰某
日某時有道人送二牛至憶其時正立談頃也自是知
非常人頗禮之又一日張為其徒說周易道人從牕外
聽之呼曰君所述皆俗說試叩之名理出人意表生受
其學遂以說易擅東方一日薄暮大雷雨震電張閉門
從牕隙中見天神數百輩圍繞道士房如作禮狀驚愕

不敢喘息比達曙雨止開門視之道士門已反鑄寂無人矣是夜山中道觀數十百處皆見道士馬

宋孝廉數學

雲間宋孝廉幼清

懋澄

副都御史直方

微與

父也精數學直

方生時預書一紙緘付夫人曰是子中進士後乃啟視之至順治四年丁亥捷南宮開前緘有一行字云此兒三十年後當事新朝官至三品壽止五十後果於康熙丙午以宗人府丞遷副都御史至三品明年丁未卒官

年正五十也又嘗與淮南白孝廉同年友善白亦精數
學一日晨起謂夫人曰今年九月某日白兄當死渠無
子我當渡江取別為治後事遂買舟渡江比至白已候
門迎笑曰我固知兄今日必來相送遂閉門相對痛飲
數日至期白無病而逝先生為治後事畢乃歸歸謂夫
人曰白兄事已完吾明年三月亦當逝矣如期而卒宋
有九齋集如裨官家劉東山杜十娘等事皆集中所載
也

張谷山

張谷山潁州人日與小兒嬉戲人不知其有道者也張有表兄客薊州一日除夕嫂方製餛飩祀先念夫而歎谷山在側曰嫂無憂吾為嫂今日一至兄所請寄餛飩為信潁去薊二千餘里日未移晷已返云適至薊見兄亡恙嫂笑其妄谷山探懷出家書及夫昔所絮衣云此豈妄耶自是人始驚其神異後入武當山不知所終遺二陶器盛夏盛肉不腐此與萬回事相類劉公弼吏部

說

陶松雲

陶松雲者居吳江自謂少時遇許旌陽謂曰吾弟子三十餘人皆在下界汝其一也今命汝以度人為功行汝其慎之常有一士夫往謁陶求養生術陶語人曰此人不久當死安望長生問其故云凡人作虧心事一事則神縮一寸今觀此君神纔數寸耳竟如其言

李神仙

利津李神仙者占卜射覆多奇中霑化李吉津宮詹

呈祥

在京師一日問李前程事李書一聯云洗耳自同高士
潔披襟不讓大王雄後半載宮詹以建言流徙出關途
次永平有一秀才迎道側具刺自言貧苦求資助視其
名則高士潔也大駭歎及出關一守備王姓素受宮詹
恩聞公至遠來相送因為誦前詩及第六句王駭曰雄
即某小字也李公太息以為定數不爽如此至康熙元
年

詔許生還李公一日偶舉此事語長洲尤太史展成侗
尤又駭曰此詩乃某昔年戲作論語詩中之一也李今
已老尚往來燕趙齊魯間

洞庭神

宋牧仲

聲

言其鄉梁中翰

遂

奉使西粵時道出洞庭風

日晴明呼風而渡忽雷雨驟至雲氣晝晦舟中人共見
一神人美鬚髯戴烏紗巾騎異獸行水上獸身半在波
濤中僅露頭角後一人形貌怪偉銜獸尾而行其速如

飛去船里許人獸皆漸騰上雲雨晦冥遂不復見舟人
以為洞庭之神也

梁丙戌進士後官
山東提學道僉事

雷侍御子

井研胡菊潭相國

世安

嘗說其邑雷侍御某為縣令時生

一子八歲而夭後復生一子年七八歲一日晨睡不醒

喚久之乃覺自云適見其兄來呼入一山似非人境且

贈之詩云三生未了塵凡業一夕初完渾沌胎紫炁臺

前千劫盡白羅天外百花開正吟末句忽云父母喚汝

可去為我致問安好也高念東侍郎說

前知

郭學憲

諫

福山人兵部尚書君弼先生

宗

曾孫言其縣

人劉某少雲遊四方餘二十年始歸明末山東亂諸郡縣皆嚴守禦縣令召劉問休咎劉云城必無恙守亦得不守亦得然某必死兵令笑曰城既無恙汝但留城中何患劉曰數定矣不可逃也遂辭去至城西一村村人皆避兵他徙劉獨止不去適有兩人避兵過之劉指東

路曰此去直東凡有山林處皆可避即途遇敵騎毋恐
必無害兩人強之同行不可但云明日覓我骸骨於村
西某樹下即兩君報我矣疾走勿復顧兩人不得已趨
去道遇鐵騎絡繹竟免俘執兵去如約訪之果死樹下
矣城亦無恙乃告於令葬之

地震

康熙戊申六月十七日戌刻山東江南浙江河南諸省
同時地大震而山東之沂莒郯三州縣尤甚郯之馬頭

鎮死傷數千人地裂山潰沙水湧出水中多有魚蟹之屬又天鼓鳴鐘鼓自鳴淮北沭陽人白日見一龍騰起金鱗爛然時方清明無雲氣云

梁尚書

鄔陵梁尚書

廷棟

官陝西一日按部河州有通官四人迎

於道左其一人望見梁公股栗伏地比至稱病不謁梁怪之勒令出見一見怒甚即核其交通外姦侵冒軍實罪狀劾而殺之將服刑告人曰吾死固矣吾少時至一

山寺見寺僧饒於貲吾以計殺而掠之今三十餘年矣
頃望見梁公之貌宛然僧也又一目眇吾死固矣尚書
從孫曰緝侍御熙說

劉尚書琴

鄆陵刑部尚書劉公訥前刑書璟子也性嗜琴嘗蓄一
蕉葉琴其輕如蟬翼蓋古物也一日晝寢初覺見一黃
衣人坐而鼓之其聲絕妙起視則無所覩矣公自是琴
理益精河南亂後失琴所在

王祭酒

吾郡歷城明翰林王公敕字雲芝成化甲辰進士及第
第三人諸生時讀書卧牛山寺夜見地有火光發之得
石匣匣有書二冊讀之遂能御風出神知未來休咎生
平異事甚多嘗與僧采枸杞山上僧先下扣門公已先
在啟扃官河南四川督學試日諸生見鎖院牕廡各有
一公危坐一日見白雲一片命騎追之雲落地化為石
色如雪煮食之其甘如飴曰此雲母也行輝縣山中忽

下輿拜曰丈乃在此今掘地得奇石置之百泉書院又於道左右垣中開視得紫石硯二枚各有鴛鴦一隻雌雄相向嘗云地如竹篩眼凡有異寶皆可見又采杞僧臨終公問所欲曰欲富貴兼之公曰但可作一藩王耳朱書其背曰蜀王比王生第二子背上隱隱有書字尹恭簡旻寢疾問之曰有大鶴入室飛旋已而颺去公之神也果然官終南國子祭酒預知死期怛化時四城門皆見公羽衣鶴氅而去如雲水道人鄉人於良鄉道中

遇鼓吹從南來視之乃公也王陽明素推服之張尚書
鶴鳴為作傳先贈司徒公生時大父方伯贈司徒公取
公名名之

民母鼻子

民母嫡母也見漢服虔注又王伯厚漢制考云始生子
為鼻子

倉頡

倉頡祠墓在壽光縣城西門瀕河劉文和公

瑯

縣人也

幼時讀書外塾每往返涉水輒有白鬚老人負之久之
問何人答曰我倉頡所遣迎送公者他日富貴毋相忘
公既貴後謁倉頡祠有侍者形容宛如所見遂新其祠
墓云

靖州鷄鵝

靖州觀音寺與副將某署相隣一日厨人宰鵝鵝忽飛
上寺殿鵝尾僧異之因乞施寺中每朝夕課誦鵝輒上
殿諦聽日食蔬飲水而已自順治中至今二十餘年尚

在又明季寺有一鷄亦在佛前晨夕聽經如是四十年
化去一夕見夢老僧曰弟子已往生武岡王府三年後
師可來一相視僧異其言及期往武岡郡王生子適三
歲矣不能言見老僧至忽問訊曰別師三載無恙乎僧
歸紀其事於石有吳君者從軍湖南至寺親見之蠢動
俱含佛性信然

趙解元

趙浮山

舟作

登州大嵩衛人順治甲午領解乙未公車入

京師居汾陽館館中廳事有武安王神像趙居其側偶狎一妓其父趙翁曾官通判里居放榜之夕忽夢入一大城有偉丈夫自委巷出揖翁問曰君非趙某耶曰是也曰吾潘姓闕帝下直日功曹也爾子本應今科高第入翰林以近日得罪神明奏聞上帝且降罰矣頃之鼓樂駟從駢闐而至有神人我冠盛服手黃紙功曹亟指示曰旨下矣可俯伏聽之翁如言竊視紙上則大書趙作舟三字以硃筆勒之功曹曰君可去矣郎君罪止罰

科耳作舟既下第歸入門翁詰其故且具述夢中所見
作舟悚然後蹭蹬公車者二十四年署東平州學正康
熙己未始登第改翰林院庶吉士親述其事如此

異馬異牛

癸亥在京師見一馬索值千二百金通身毛如新鵝兒
黃無一莖異惟尾鬣獨黑又一馬索值五百金通身如
雪上作桃花文紅鮮可愛又額駙石公家一紫花牯牛
丈如海棠色施銜勒走及奔馬云得之南中

波斯犬

嘗於慈仁寺市見一波斯犬高不盈尺毛質如紫貂聳
耳尖喙短脰以哆囉尼覆其背云通曉百戲索價至五
十金亦宋太宗桃花犬之屬也

梅異

宣城自

本朝來科甲久不振康熙己未施侍講愚山

閨章

高檢討

阮懷詠

以辟薦孫編修予立

卓

荈編修楚畹

薦馨

以鼎甲

四人同時入翰林時施園有梅三月復開四花其方位

恰應四人所居人以為異梅孝廉淵公清繪為圖壬戌

阮吉士爾詢亦入翰林或謂宣城有文昌閣久頽廢甫新

之五君遂相次入翰林云壬戌節卒癸亥施孫相繼卒
乙丑高卒又不知何說也

籤驗

京師前門闕帝廟籤夙稱奇驗予順治己亥謁選往祈
初得籤云今君庚甲未亨通且向江頭作釣翁玉兔重
生應發跡萬人頭上逞英雄又云玉兔重生當得意恰

如枯木再逢春爾時殊不解是年十月得揚州推官以
明年庚子春之任在廣陵五年以甲辰十月內遷禮部
郎所謂庚申者蓋合始終而言之揚郡瀕江故曰江頭
也然終未悟後二句所指至庚申年八月置閏而予以
崇禎甲戌生實在閏八月過閏中秋四閱月遂蒙

聖恩擢拜國子祭酒於是乃悟玉兔重生之義諺云飲
啄皆前定詎不信夫

名龜

麟鳳龜龍並稱四靈漢唐宋已來取龜字命名者不可勝紀至明遂以為諱殊不可解惟張太嶽生時其母夢一大龜入室因名之曰龜後夢神人謂洩天機乃易名

蜘蛛塔

京師城西慈慧寺有蜘蛛塔萬厯中少詹南充黃公平倩輝書碑平倩號禪悅與僧愚菴善嘗住此寺一日方誦金剛經次一蜘蛛緣案上向佛而俯驅之復來黃曰爾以聽經來耶為誦終卷又為說情想因緣竟蜘蛛立

金匱要略卷之二十二
蛻化去因以桑門法起塔復書碑記其事云

義蜂冢

金山有義蜂冢鎮江府廨有蜂一筒逸出其王斃羣蜂
相揉藉爭死之不下萬餘嘉靖中鎮江嚴同知者為立
義蜂冢徐尚書養齋問作蜂冢歌紀事云羣蜂勢方屯
主蜂自殘折意氣許與成君臣義心欲奮秋陽烈摧軀
扶股同死君田橫門客多如雲後人重死不重義奉頭
鼠竄何紛紛微蟲感恩乃至爾吁嗟萬靈不如此金山

山高江水寒孤冢蒼茫為誰起西園雜記云嚴名應階
綠雪堂雜言云在北固山楊邃菴閣老表為義蜂冢

萬孔

明成化中萬安為相與萬貴妃通族為古今笑柄然陳
後主時都官尚書孔範與孔貴嬪結為兄妹已前此矣
乃知奸邪行事亦有所本

謝鳳

宋謝鳳康樂之子超宗父也元嘉中為鄞令

今奉化縣屢著

靈興縣人祠之元大德十二年饑有巨艘自南劔運米至鮎亭聞有人招之者曰吾謝鳳也人賴以活至正中寧海賊犯境官軍逆戰仰見大旗飛揚萬騎雲合旗有謝字駭賊而奔斬獲無數貝瓊清江集有謝公廟記

懿徽二宗事相類

學圃薏蘓載唐懿宗於苑中取石造山崎危詰屈有若天成又命取終南草木植之山禽野獸縱其往復造屋室如庶人家未及半年奇花異草自然生滿宮殿識者

以為丘墟之象與宋徽宗艮嶽事絕相類

水晶

門人南陽李鴻嘗贈予印章色類梅檀質如玉上作龜紐甚精云是水晶海外產也

宋諸相八字

宋人小說載蔡京八字丁亥壬寅壬辰辛亥與東京鄭粉兒子干支盡同猗覺寮雜記韓莊敏與吳冲卿王禹玉同詣天祿山人卦肆莊敏先云己未七月初九日寅

時生禹王午時生天祿皆云極貴後俱宰相能改齋漫
錄載曾布八字乙亥丁亥辛亥己亥與章惇同乙亥生
章戲呼曾為四亥公又蕭注八字癸丑乙丑乙丑丁丑
王安石以辛酉十一月十二日辰時生韓絳以辰年辰
月辰日辰時生布以大觀元年八月二日卒其弟肇以
三日卒先後才一日京與祖某父準皆以七月二十一
日卒三世同忌日見老學菴筆記

何中官

勺中志略載弘治時中官何文鼎以寧壽侯事忤孝宗
死後於宮中常戛銅缸為厲按西園雜鈔云孝皇始甚
怒既聞文鼎言然之止責置南京閒住鄭端簡公吾學
編餘云文鼎素忠直二張褰視御帷文鼎持大瓜簞之
幾死泰陵竟不罪文鼎三說皆不同然死而為厲之說
非實錄

相國孫

雲間某相國之孫某乞米於人歸途無力自負覓一市

傭代之嗔其行遲曰吾生相門不能肩負固也汝傭也
胡為亦爾對曰吾亦某尚書孫也此聞諸董蒼水俞孝
廉者貴人子孫不可不知

宋三賢八字

富文忠公以甲辰正月二十日巳時生蘓子容以庚申
二月二十二日巳時生王正仲以癸亥正月十一日申
時生李公擇孫莘老相善公擇卒以元祐五年二月二
日莘老以三日先後才一日俱見吳曾漫錄

左手把筆

棗強宋中郎

師祁

康熙丁未進士工諸體書後知獲嘉縣

忽遘風疾遂以左手把筆其工不減於舊老學菴筆記
載陸元長宗室不微梁子輔皆用左手作字勝於右手
又趙廣以左手畫觀音大士信有之矣

故藩址

濟南德藩故宮面南山負百花洲宮中泉眼以數十計
皆澄泓見底石子如擣菹然青州衡藩故宮亂後尚存

望春樓及流觴曲池上有偃蓋松蓋數百年古物予順
治丙申飲於此甘橘繡毬尚數十株後丙午丁未間周
中丞有德另建撫署乃即德藩廢宮故址移衡藩木石以
構之落成壯麗甚衡藩廢宮鞠為茂草矣放翁記長安
民家契券四至有云某處至花萼樓某處至含元殿者
古今皆然

山無僧寺

陸放翁云天下名山惟華山青城茅山無僧寺吾鄉勞

山亦無僧寺明萬厯間憨山大師建海印寺於勞山尋
為道流所訟譴戍粵東

米太僕研

米紫來翰林

漢吏

說其大父太僕公

萬鍾

知六合縣日蓄一

古研甚寶惜一日渡江沈於水急懸重賞募善泅者下
取之百計不能得但惋惜而已次早將解纜忽有紅霞
起水面其光燭天公曰必吾研也命舟人於其下索之
研果隨手出公大喜賞之如格

煞風景

予在江南時目擊煞風景者四事一金陵桃葉渡順治
初一縣令邵姓者建橋其上榜曰利濟一青溪長板橋
明末為葛禮部寅亮所毀一焦山焦先祠像設作冕旒
如王者旁設儀仗一金山築城壘有鎮江孔知府者曲
阜聖裔也於諸門朱書乾坎艮震等字山有裴頭陀藏
金洞孔改題曰開山第一洞每舉似人皆為捧腹

白帽子

張影繡庶常

光

南宮人康熙戊午赴順天鄉試時其父

病意不欲往父強之再三乃行是夜宿旅舍夢有人送一白帽子令著覺而惡之自是每夜必夢心悸欲歸而父書至言病良已遂勉終場事歸途夢亦如初抵家父已久愈而報人尋至則張領解矣是夕遂不復夢明晨賀客麇至一客忽云邑中自大司馬白公後久無冠冕者喜君繼之張始恍然而悟白公諱圭前明正統某科解元累官兵部尚書

宮侍御

泰州宮侍御宗衮

夢仁

初名弘宗久困場屋欲更名一夕

夢鄉前輩林會元東城

春

手書一冊予之林公字子仁

於是更名夢仁是科己酉遂舉順天鄉試明年庚戌中會元癸丑殿試入翰林改御史

名字

予兄叔子

士祐

十餘歲時在家塾一日會食有舉焦太史

姓名為問者或曰此無它亦如魏相字弱翁之類耳凡

在末坐遙對曰非也此本考工記輪人竝其輻廣以為之弱舉坐驚歎以為夙慧

老子

唐追尊老子為玄元皇帝至宋政和中崇奉道教又詔陞老子於列傳之首別為一帙尊道德為大經御製註解令學者與易書等經分習之禁以耳聃伯陽命名其為兩代尊奉如此

論語識

論語識云孔子讀易韋編三絕鐵搗三折漆書三滅後
世但知韋編一語下二語遂不著又王原叔云顏子讀
書鐵鐫三摧風俗通古今注云趙高用事獻蒲為脯指
鹿為馬鄭康成禮器注趙高欲作亂以青為黑黑為黃
今人但知鹿馬一語高僧傳載支道林嘗養一鷹人或
問之答曰當以神俊今人但知其賞馬不知其賞鷹惟
坡公有支遁鷹馬圖詩世說郭林宗還鄉里送車千乘
獨李膺與林宗共乘薄笨車上大槐坂觀者望之若鵞

松之在霄漢然世止知同舟而不言同車

王延喆

明尚寶少卿王延喆文恪少子也其母張氏壽寧侯鶴齡之妹昭聖皇后同產延喆少以椒房入宮中性豪侈一日有持宋槧史記求粥者索價三百金延喆給其人曰姑留此一月後可來取直乃鳩集善工就宋版本摹刻甫一月而畢工其人如期至索直故給之曰以原書還汝其人不辨真贋持去既而復來曰此亦宋槧而紙

差不如吾書豈誤耶延詰大笑告以故因取新雕本數十部散置堂上示之曰君意在獲三百金耳今如數予君且為君書幻千萬億化身矣其人大喜過望今所傳有震澤王氏摹刻印即此本也又有持琥珀求售者中有蜘蛛形狀如生索值百金延詰謂蛛果生耶曰然然則碎而視之果爾即償百金否則一錢不直手碎之果有生蛛自內躍出行几上數巡見風化為水乃立以百金償之其豪快如此

聖泉

貴陽城西南有聖泉有貴人至輒沸起驗之百不失一
滇逆將倡亂雲貴總督甘公文焜暨諸大吏一日遊泉
上泉不沸怪之未幾亂作甘死之又陸邾縣次雲說孫可
望在黔中時有僭逆之志至泉卜之水竟不至可望怒
以礮擊之今泉上石欄礮痕尚存

蘓文

宋時諺云蘓文熟啖羊肉殿帥姚某性饕餮每得坡公

手帖輒換得羊肉數斤故坡有傳語本官今日斷屠之
詭杜祁公為相清儉非會客不食羊肉按宋時京官日
支羊肉錢故云

廈門塼刻

明季崇禎庚辰歲有閩僧貫一者居鷺門

即今廈門

夜坐見

籬外坡陀有光連三夕怪之因掘地得古塼背印兩圓
花突起面刻古隸四行其文曰草鷄夜鳴長耳大尾干
頭銜鼠拍水而起殺人如麻血成海水起年減年六甲

更始庚小熙皞太平千紀凡四十字閩縣陳衍盤生明
末著槎上老舌一書備記其語至今癸亥四十四年矣識
者曰鷄酉字也加草頭大尾長耳鄭字也干頭甲字鼠
子字也謂鄭芝龍以天啟甲子起海中為羣盜也明年
甲子距前甲子六十年矣庚小熙皞寓年號也前年萬
正色克復金門廈門今年施琅克澎湖鄭克塽上表乞
降臺灣悉平六十年海氛一朝盪滌此固

國家靈長之福而天數已預定矣異哉

風聞

陳衍云風聞二字出漢書尉佗傳風聞老夫父母墓已壞削又晉書顧和對王導曰明公寧使網漏吞舟何忍採風聞以察察為政

少正

陳衍云少正卯其人名卯而官少正也當時魯鄭皆有少正之官列於卿故子產亦稱少正按氏族博考云以官為氏者有公正宗正少正令等蓋卯官少正其後

列國為此官者子孫因以為氏耳

郝氏遇仙

霸州郝恭定公

惟訥

母李太夫人戶部侍郎傑之配也孕

公時家有盜警夫人倉卒墜樓傷股忽有老嫗詣門自言能療且曰腹中兒當大貴吾并活之先一手摩股久之投藥少許骨格格有聲遂相屬胎竟不墮酬以金帛辭弗受竟去不知所之後公中順治丁亥進士歷官左都御史工刑禮戶吏五部尚書

神黃豆

神黃豆產滇之南徼西南彝中形如槐角子視常豆稍巨用簞瓦火焙去其黑殼碾作細末白水下之可永除小兒痘毒服法以每月初二日十六日為期半歲每服半粒一歲每服一粒一歲半每服一粒半遞加至三歲服三粒則終身不出痘矣或曰按二十四氣服之以二十四粒為度雲南趙王峯士麟中丞王子珩瑜刑部說

癸亥地震

康熙癸亥十月初五日山西巡撫穆爾賽疏報太原府屬地震凡十五州縣而代州崞縣繁峙為甚崞縣城陷地中毀廬舍凡六萬餘間與丁未山東己未京師之災相似

族望

唐人好稱族望如王則太原鄭則滎陽李則隴西贊皇杜則京兆梁則安定張則河東清河崔則博陵之類雖傳誌之文亦然迄今考之竟不知為何郡縣人殊可恨

宋人罷官者多居近畿不歸其鄉死即葬焉子孫亦遂
占籍如鉅野晁氏東萊呂氏華陽范氏梓州蘓氏簡代
居京師又如歐陽居潁而葬新鄭蘓氏居許而葬邙後
世過廬陵眉州者豈復可尋其彷彿耶此二者至明乃
無之

魚石

前即墨令周岷公

斯盛

說汧陽縣有魚石如饅頭狀破之

即成兩石各有一魚形鱗鬣宛然以手摩拊之作魚腥

云此山一溪中所產石子盡然溪有魚石娘子廟求石者必禱之不禱則石皆無魚也前邾令陸雲士次雲又說新昌縣有水簾洞洞口出石亦如饅頭狀人戲云欲得糖者或肉或菜者破之一一逼肖造物狡獪如此

叫蛇

粵西有叫蛇能呼人姓名應之即死然性畏蜈蚣逆旅主人每以篋貯蜈蚣客至輒授之令置枕旁云夜半舍外有呼姓名者慎勿應但開篋縱蜈蚣蜈蚣即徑去食

蛇腦已仍還篋中

泰山孝子

順治十年四月泰安州知州某於泰山下行忽見片雲
自山嶺下雲中一人端然而立初以為仙及墜地則一
童子也驚問之曰曲阜人孔姓方十歲母病私禱太山
府君願殞身續母命母病尋愈私來捨身巖欲踐夙約
不知何以至此知州大嗟異以乘輿載之送歸

蘓公墓

邳縣二蘓公墓明末劇寇吳宗聖作亂松柏剪伐無餘

順治初知縣張石只

篤行章丘人
丙戌進士

至謁墓下復為封樹

立碑增植松樹千餘株題詩云峨眉遙望獨傷情樹盡
碑殘野草生莫道荒村烟火絕山家今日是清明是夜
夢一青衣曰東坡遣致謝問先生今何在曰在臨汝公
至彼當相見是歲七月以事至汝州有青衣款門遺一
卷乃東坡墨蹟蜀岡送蘓伯固之嶺南五言詩也青衣
忽不見張異之因命工摹勒于石自記其本末如此

洞溪物產

陸次雲洞溪纖志所載物產有絕奇者略記于此風鬼
出黔中無形無影能以旋風攝人夜叉產蜀之黎州穴
生長七尺亦名曰攬路見婦人盜之入穴生子以楊為
姓木客產粵洞中衣服舉止與人不異在恍惚有無間
野婆亦產粵西狀如嫗陟險如飛遇男子負去求合嘗
有人刺其腰間得一玉印篆文莫能識黃丈鬼生東粵
身著黃衣能為疫癘潛牛居江中能上岸與牛鬬角軟

入水濡之復鬪其力甚銳肉翅虎飛而下山食人食已復飛去月山叢談云夔州府有鬼物名小神子高尺餘一二十為羣依人以居自景泰間始有之皆異聞也

成御史遇仙

前御史樂安成公寶慈勇明崇禎中以疏救黃公石齋周謹戍鼎革後隱崑崙山中一日大雪登絕頂遙見松林中有人僵卧意其凍死趨而視之四面皆積雪無人跡其人衣木葉卧處丈許獨無雪見公至蹶然而起曰

候公久矣問其年云不記年歲祇憶少在京師見楊椒
山赴西市遂發憤出家學道耳向見左蘿石沈周泉二
公託訊公起居故候於此問二公何在曰在上帝左右
因又言二公每欲薦公自代沈公云成公正人顧嘗疑
我今其疑須釋成公聞之惘然有問曰昔沈公疏論漳
浦遺書及我我不答此事人無知者誠不妄矣道人自
言有長生術當授公公曰吾陳人也以速死為幸長生
何為道人曰聊試公耳二年後清明日當偕二公候公

言畢謝去步履如飛公果以康熙戊戌清明無疾而逝

響豆

同年李侍郎奉倩迴言樂安縣有孫公者年九十強健如四五十歲人自言生平惟服響豆每歲槐子將熟時輒令人守之不令鳥雀啄落既成實即收作二枕夜聽其有聲者即響豆也因棄其餘如是數易而得響豆所在每樹不過一枚每歲服不過一粒如是者數十年矣無他術也



池北偶談卷二十二